

摛藻堂四庫全書薈要

集部

欽定四庫全書叢要

集部

御定全唐詩卷三百十八

四至

詳於官候補通督司經歷臣郭祚熾

欽定四庫全書
唐詩卷三百十四

御定全唐詩卷三百十四

集部

陳京

陳京字慶復陳宣都王叔明五世孫擢進士第累遷太常博士擢右補闕與趙需張薦共劾盧杞終秘書少監詩一首

享文恭太子廟樂章

歌以德發聲以樂貴樂善名存追仙禮異鸞旌拱修鳳

鳴合次神聽皇慈仲月皆至

韋渠牟

韋渠牟京兆萬年人少慧悟涉覽經史初為道士後為僧韓滉表試校書郎德宗誕日召之同佛老師講論大義愛其辨博因奏七十詣詩旬日再轉右補闕內供奉遷諫議大夫數召對奏事終太常卿詩集十卷今存二

十一首

步虛詞十九首

玉簡真人降金書道籙通煙霞方散日雲雨已生風四
極威儀異三天使命同那將人世戀不去上清宮

羽駕正翩翩雲鴻最自然霞冠將月曉珠珮與星連鏤
玉留新訣雕金得舊編不知飛鸞鶴更有幾人仙

上帝求仙使真符取玉郎三才閒布象二景鬱生光騎
吏排龍虎笙歌走鳳皇天高人不見暗入白雲鄉

鸞鶴共襄回仙官使者催香花三洞啟風雨百神來鳳
篆文初定龍泥印已開何須生羽翼始得上瑤臺

羽節忽排煙蘚君已得仙命風驅日月縮地走山川幾處留丹竈何時種玉田一朝騎白虎直上紫微天

靜發降靈香思神意智長虎存時促步龍想更成章扣齒風雷響挑燈日月光仙雲在何處髣髴滿空堂

幾度遊三洞何方召百神風雲皆守一龍虎亦全真執節仙童小燒香玉女春應須絕巖內委曲問皇人

上法杳無營之修似有情道宮瓊作想真帝王為名召岳馳旌節驅雷發吏兵雲車降何處齋室有仙卿

羽衛一何鮮
香雲起暮煙
方朝太素帝
更向玉清天
鳳曲凝猶吹
龍驂儼欲前
真文幾時降
知在永和年

大道何年學
真符此日催
還持金作印
未要玉為臺
羽節分明授
霞衣整頓裁
應緣五雲使
教上列仙來

獨自授金書
蕭條詠紫虛
龍行還當馬
雲起自成車
九轉風煙合
千年井竈餘
參差從太一
壽等混元初

道學已通神
香花會女真
霞牀珠斗帳
金薦玉輿輪
一室心偏靜
三天夜正春
靈官竟誰降
仙相有夫人

上界有黃房仙家道路長神來知位次樂變叶宮商競
把瑠璃盞都傾白玉牒霞衣最芬馥蘪合是靈香
珠珮紫霞纓夫人會八靈太霄猶有觀絕宅豈無形幕
雨襄回降仙歌宛轉聽誰逢玉妃輦應檢九真經
西海辭金母東方拜木公雲行疑帶雨星步欲凌風羽
袖揮丹鳳霞巾曳彩虹飄颻九霄外下視望仙宮
玉樹襟金花天河織女家月邀丹鳳鳥風送紫鸞車霧
縠籠綃帶雲屏列錦霞瑤臺千萬里不覺往來賒

此首一作吳筠詩

舞鳳凌天出歌麟入夜聽雲容衣渺渺風韻曲泠泠扣齒
端金簡焚香檢玉經仙宮知不遠祇近太微星

紫府與玄洲誰來物外遊無煩騎白鹿不用駕青牛金化
顏應駐雲飛鬢不秋仍聞碧海上更用玉為樓此首一作吳筠詩

鸞鶴復驂鸞全家去不難鷄聲隨羽化大影入雲看釀玉
當成酒燒金且轉丹何妨五色綬次第給仙官

覽外生盧綸詩因以示此

衛玠清談性最强明時獨拜正員郎關心珠玉曾無價

滿手瓊瑤更有光謀略久參花府盛才名常帶粉闌香
終期內殿聯詩句共汝朝天會柏梁

贈竇五判官

故舊相逢三兩家愛君兄弟有聲華文輝錦綵珠垂露
逸興江天綺散霞美玉自矜頻獻璞真金難與細披沙
終須撰取新詩品更比芙蓉出水花

竇參

竇參字時中岐州人以門蔭累官中丞德宗以為宰相

後貶郴州別駕賜死詩三首

湖上閒居

一作居
湖上

避影將息陰自然知音稀向來深林中偶亦有所窺飛
鳥口銜食引雛上高枝高枝但各有一子其子各安知宜
不宜止止復何云物情何自私

一作
可知方

遷謫江表久未歸

一自經放逐襄回無所從便為寒

一作
出

山雲不得隨飛

龍名豈不欲保歸豈不欲早苟

一作
苦

無三月資難適千

里道離心與羈思終日常草草人生年幾齊憂苦即先
老誰能假羽翼使我暢懷抱

登潛山觀

山勢欲相抱一條微徑盤攀蘿歇復行始得凌仙壇聞
道葛夫子此中鍊還丹丹成五色光服之生羽翰靈草
空自綠餘霞誰共餐至今步虛處猶有孤飛鸞幽幽古
殿門下壓浮雲端萬丈水聲落四時松色寒既入無何
鄉轉嫌人事難終當遠塵俗高卧從所安

盧羣

盧羣字載初范陽人曹王臯節度江西奏為判官入為監察御史累遷兵部郎中秘書監終天成軍節度使詩一首

淮西席上醉歌

祥瑞不在鳳凰麒麟太平須得邊將忠臣衛霍真誠奉主貔虎十萬一身江河潛注息浪蠻貊欵塞無塵但得百寮師長肝膽不用三軍羅綺金銀

韋皋

韋皋字城武一作武臣京兆人始仕為建陵挽郎張鎰節度

鳳翔署營田判官德宗狩奉天授隴州刺史置奉義軍
拜節度使帝自梁洋還召為左金吾衛將軍遷大將軍
貞元元年出為劍南西川節度使在蜀二十餘年封南
康郡王詩三首

天池晚櫂

雨霽天池生意足花間誰詠採蓮曲舟浮十里芰荷香

歌發一聲山水綠春暖魚拋水面綸晚晴鷺立波心玉
扣舷歸載月黃昏直至更深不假燭

贈何遐

第三句
缺一字

腰間寶劍七星文掌上彎弓挂六鈞箭發雲雙雁落
始知秦地有將軍

憶一作玉簫

玉簫者江夏姜使君家青衣也臯
微時客于姜與之有情以玉指環

及一詩遺之訂後約久之玉簫鬱念成疾死姜
以環著中指蓋焉後臯鎮蜀生日東川獻歌姬
亦名玉簫而貌正同中指肉隱起如所著玉環時以為感臯意再生云

黃雀銜來已數春
別時留解贈佳人
長江不見魚書至
為遣相思夢入秦

李原

李原隴右人
嚴之子以父勲拜太子賓客終檢校司空
河中節度詩二首

觀翟玉妓

女郎閨閣春抱瑟
坐花茵艷粉宜斜燭
羞蛾慘向人寄情
搖玉柱流眄整羅巾
幸以芳香袖承君
宛轉塵

思婦

良人久不至惟恨錦屏孤顛賴衣寬日空房問女巫

王智興

王智興字匡諫懷州人起牙將自貞元至太和歷戰功

進位侍中封雁門郡王詩一首

徐州使院賦

長慶中智興為徐州節度一日從事於使院會飲賦詩智興召護軍

俱至從事屏去翰墨智興曰適聞作詩何獨見某而罷復以牋陳席上小吏亦置牋於智興前

於是引毫立成

云云四座驚嘆

三十年前老健兒剛被郎中遣作詩江南花柳從君詠
塞北煙塵我獨知

袁高

袁高字公頤恕已之孫擢進士第建中中拜京畿觀察使坐累貶韶州刺史復拜給事中憲宗時特贈禮部尚書

書詩一首

茶山詩

禹貢通遠俗所始一作圖在安人後王失其本職吏不敢

陳亦有姦佞者因茲欲求伸動生千金費日使萬姓貧
我來顧渚源得與茶事親毗輟耕農耒一作黎
毗輟農桑采采

一
採
掇

實苦辛一夫旦當役盡室皆同臻捫葛上欹壁蓬

頭入荒榛終朝不盈掬手足皆鱗皴一作皴悲嗟遍空山

皴

草木為不春陰嶺芽未吐使者牒已頻心爭造化功走

挺麋鹿均選納無晝夜搗聲昏繼晨衆工何枯櫨俯視
彌傷神皇帝尚巡狩東郊路多堙周迴遼天涯所獻愈

艱勤况減兵革困重茲固疲民未知供御餘誰合分此

珍顧省忝邦守又慙復因循茫茫滄海間丹憤何由申

崔子向

崔子向貞元間為檢校監察御史後終南海從事詩三首

送惟詳律師自越之義興

陽羨諸峰頂何曾異剡山雨晴人到寺木落夜開關縫
衲紗燈亮一作晃看心錫杖閒西方知有社未得與師還

上鮑大夫

防

行盡江南塞北時無人不誦鮑家詩東堂桂樹何年折
直至如今少一枝

題越王臺

越井岡頭松柏老越王臺上生秋草古木多年無子孫

牛羊一作野人踐踏成官道

張署

張署河間人貞元中監察御史謫臨武令歷刑部郎虔
澧二州刺史終河南令詩一首

贈韓退之

九疑峰畔二江前
戀闕思鄉日抵年
白簡趨朝曾竝命
蒼梧左宦一聯翩
鮫人遠泛漁舟水
鵬鳥閒飛露裏天
漁汗幾時流率土
扁舟西下共歸田

歸登

歸登字冲之吳縣人崇敬之子貞元初策賢良為右拾
遺轉右補闕起居舍人順宗為皇太子登父子侍讀及
即位以東宮恩拜給事中遷工部侍郎復為皇太子諸

王侍讀累進工部尚書卒謚曰憲詩一首

享惠昭太子廟樂章

請神

嘉薦既陳祀事孔明間歌在堂萬舞在庭外則盡物內
則盡誠鳳笙如聞歆其潔精

御定全唐詩卷三百十四

欽定四庫全書
薈要卷一萬七千七百二十

集部

御定全唐詩卷三百十五

朱放

朱放字長通，襄州人。隱於越之剡溪。嗣曹王皋鎮江西，辟節度叅謀。貞元初召為拾遺，不就。詩一卷。

劄溪行却寄新別者

潺湲寒溪上自此成離別回首望歸人移舟逢暮雪頻
行識草樹漸老傷年髮唯有白雲心為向東山月

九日陪劉中丞宴昌樂寺送汎廷評

獨坐三臺妙重陽百越間水心觀遠俗霜氣入秋山不
棄遺簪舊寧辭落帽還仍聞西上客咫尺謁天顏

經故賀賓客鏡湖道士觀

已得歸鄉里逍遙一外臣那隨流水去不待鏡湖春雪
裏登山屐林間漉酒巾空餘道士觀誰是學仙人

送著公歸越

甫一作皇曾詩

誰能愁此別到越會相逢長憶雲門寺門前千萬峰石

牀埋積雪山路倒枯松莫學白道

一作衣

士無人知去蹤

秣陵送客入京

秣陵春已至君去學歸鴻綠水琴聲切青袍草色同鳥
喧金谷樹花滿洛陽宮日日相思處江邊楊柳風

靈一作雲門寺贈靈一上人

所思勞旦一作日夕惆悵去湘一作湖東禪客知何在春山

幾處同獨行殘雪裏相見暮雲中請住東林寺彌一作窮

年事遠公

江上送別

浦邊新見柳搖時北客相逢只自悲惆悵空知思後會
艱難不敢料前期行看漢月愁征戰共折江花怨別離
向夕孤城分首處寂寥橫笛為君吹

歸桐廬舊居寄嚴長史

一作章詩

昨辭天子棹歸舟家在桐廬憶舊丘三月暖時花競發
兩溪分處水爭流近聞江老傳鄉語遙見家山減旅愁
或在醉中逢夜雪懷賢應向剡川遊

竹

青林一作什

何森然沈沈獨曙前出牆同漸瀝開戶滿蟬

娟緜卷初呈粉苔侵亂上錢疎中思水過深處若山連
疊夜常栖露一作驚清朝乍有蟬砌陰迎緩策簷翠對歌

眠進筭雙分箭繁梢一向偏月過驚散雪風動極聞泉
幽谷添詩譜高人欲製篇蕭蕭意何恨不獨往湘川

銅雀妓

恨唱歌聲咽愁翻舞袖遲西陵日欲暮是妾斷腸時

毘陵留別

別離非一處此處最傷情白髮將春草相隨日日生

題竹一作鶴林寺

歲月人間促煙霞此地多殷勤竹林寺能一作更得幾迴

過

答陸澧

松葉堪為酒春來釀幾多不辭山路遠踏雪也相過

楊子津送人

今朝楊子津忽見五溪人老病無餘事丹砂乞五斤

山中謁皇甫曾

尋源路已盡笑入白雲間不解乘輶客那知有此山

剡山夜月

一題剡溪舟行

月在沃洲山上人歸剡縣溪邊漠漠黃花覆水時時白
鷺驚船

九日與楊凝崔淑期登上山會有故不得往

因贈之

欲從攜手登高去一到門前意已無那得更將頭上髮學
他年少挿茱萸

山中聽子規

一作顧
沉詩

幽人自愛山中宿又近葛洪丹井西窗中有箇長松樹
半夜子規來上啼

亂後經淮陰岸

荒村古岸誰家在野水浮雲處處愁唯有河邊衰柳樹
蟬聲相送到揚州

送張山人

知君住處足風煙
古寺荒村在眼前
便欲移家逐君去
唯愁未有買山錢

別李季蘭

古岸新花開一枝
岸傍花下有分離
莫將羅袖拂花落
便是行人腸斷時

遊石澗寺

聞道幽深石澗寺
不逢流水亦難知
莫道山僧無伴侶

獮猴一作猿長在古松枝

新安所居答相訪人所居蕭使君為制

謝公見我多愁疾一作病為我開門對碧山君若欲來看

猿鳥不須爭把桂枝攀

送魏校書

長恨江南足別離幾回相送復相隨楊柳一作花撩亂撲
流水愁殺人行知不知

送溫台

渺渺天涯君去時浮雲流水自相隨人生一世長如客
何必今朝是別離

句

愛彼雲外人求取磽底泉 風吹芭蕉拆鳥啄梧桐落

並詩

卷三百十五

御定全唐詩卷三百十五

欽定四庫全書
全唐詩卷三百二十一

集部

御定全唐詩卷三百二十一

武元衡

武元衡字伯蒼河南緜氏人建中四年登進士第累辟使府至監察御史後改華原縣令德宗知其才召授比部員外郎歲內三遷至右司郎中尋擢御史中丞順宗立罷為右庶子憲宗即位復前官進戶部侍郎元和二年拜門下侍郎平章事尋出為劍南節度使八年徵

還秉政早朝為盜所害贈司徒謚忠愍臨淮集十卷今
編詩二卷

古意

蜀國春與秋岷江朝夕流長波東接海萬里至揚州開
門面淮甸楚俗饒歡宴舞榭黃金梯歌樓白雲一作雪面
蕩子未言歸池塘月如練

塞下曲

草枯馬蹄輕角弓勁如石騎虜初欲來風塵暗南國走

檄召都尉星火勦羌狄吾身許報主何暇避鋒鏑白露
濕鐵衣半夜待攻擊龍沙早立功名向一作燕然勒

獨不見

荆門一柱觀楚國三休殿環珮儼神仙輝先生顧盼春
風細腰舞明月高堂宴夢澤水連雲渚宮花似霰俄驚
白日晚始悟炎涼變別島一作川島異波潮一作濤離鴻分海

縣南北斷相聞歎嗟獨不見

旬假南一作西亭寄熊郎中

旬休屏戎事涼雨北窗眠江城一夜雨一作一夜萬里

江城夢

繞山川草木散幽氣池塘鳴早蟬妍芳落春後旅思生秋

前紅槿粲

一作報

庭豔綠蒲繁渚煙行歌獨謠酌坐發朱

絲弦哀玉

一作生

不可扣華燭一作觴徒湛然聞君樂

一作東

林卧郡閣曠周旋酬對龍象侶灌一作泛注清冷泉如何

無礙智猶苦病纏牽

晨興寄贈竇

一作何

使君

一作晨興贈友

寄呈竇使君

江陵歲方晏晨起眄庭柯白露傷紅葉清風斷綠蘿徇

時真氣索念遠懷憂一作幽懷多夙昔樂一作山意縱橫南

東

浦波有美嬪娟子百慮攢雙蛾緘情鬱不舒幽行駢復

羅一作幽竹

自駢羅

為予一作子

歌苦寒酌一本缺旨

酒朱顏酡世

事浮雲

一作鬢後云

變功名將奈何

秋日對酒

行年過始衰秋至獨先悲事往憐

一作憐

神魄感深滋涕

洩百憂紛在慮

一作百慮
紛然在

一醉兀無思寶瑟拂塵匣徽

音

一作清韻

凝朱絲幽圃蕙蘭旨煙窗松桂姿我乏濟時畧

杖節撫藩一作維山川大兵後牢落空城池驚沙猶振
坤

野綠草生荒陂物變風雨順人懷天地慈春耕事秋戰
戎馬去封陲波瀾暗超忽堅白亦璘縕客有自嵩頰重
徵棲隱期丹訣學仙晚白雲歸谷遲君恩不可報霜露
繞南枝

安邑里中秋懷寄高員外

原憲素非貧嵇康自寡欲守道識通窮達命齊榮辱庭
梧變葵蕡籬菊揚芳馥墜葉翻夕霜高堂瞬華燭況茲

寒夜永復歎流年促感物思殷勤懷賢心躊躇雄詞封
禪草麗句陽春曲高德十年兄異才千里足咫尺邈雪
霜相望如瓊玉欲識歲寒心松筠更秋綠

送唐次

都門去馬嘶灞水春一作東流淺青槐驛路長一作直白日

離尊一作事晚望望煙景微草色行人遠

秋夜雨中懷友

庭空雨鳴驕天寒鴈啼苦青燈淡吐光白髮悄無語幾

年不與一作共 聯牀吟君方客吳我猶一作客 楚

望夫石

佳名人一作人 望夫處苔蘚封孤石萬里水連天巴江一作暮

雲碧湘妃泣下竹成斑

一作淚竹
下成林

子規夜啼江樹白

一作

深水

行路難

君不見道傍廢井傍開花原是昔年驕貴家幾度美人來照影濯纖笑引銀瓶綆風飄雨散今奈何繡闌雕甍

綠苔多笙歌鼎沸君莫矜豪奢未必長多金休說編氓
朴無恥至竟終須合天理非故敗他却成此蘓張終作
多言鬼行路難路難不在九折灣

長相思

長相思隴雲愁單于臺上望伊州鴈書絕蟬鬢秋行人
天一一本缺二字
一作山北畔暮雨海西頭殷勤大河水東注不

還流

出塞作

夙駕逾人境長驅出塞垣邊風引去騎胡沙拂征轍奏
笳山月白結陣瘴雲昏雖云風景異華夏亦喜一本缺此二字

地理通樓煩白羽矢飛先火礮黃金甲耀奪朝暎要須
灑掃龍沙淨歸謁明光一報恩

桃源行送友

武陵川徑入幽遐中有鷄犬秦人家家傍流水多桃花
桃花兩邊種來久流水一通一作道何時有垂條落葉暗
春風夾岸芳菲至山口歲歲年年能寂寥林下青苔日

為厚時有仙鳥來銜花曾無世人此擣手可憐不知若
為名君往一作任從之多所更古驛荒橋平路盡崩湍怪
石小溪行相見維舟登覽處紅堤綠岸宛然成多君此
去從仙隱令人晚節悔營營

長安叙懷寄崔十五

延首直城西花飛綠草齊迢遙隔山水悵望思遊子百
轉黃鸝細雨中千條翠柳衡門裏門對長安九衢路愁
心不惜芳菲度風塵冉冉秋復春鐘鼓喧喧朝復暮漢

家宮闕在中天紫陌朝臣車馬連蕭蕭霓旌合仙仗悠悠
劍佩入爐煙李廣少時思報國終軍未遇敢論邊無
媒守儒行榮悴紛相映家甚長卿貧身多公幹病不知
身病竟如何嬾向青山眠薜蘿鷄黍空多元伯惠琴書
不見子猷過超名累歲與君同自歎還隨鷗退風聞說
唐生子孫在何當一為問窮通

兵行褒斜谷作

古地接龜沙邊風送征鴈霜明草正腓峰逼日易晏集

旅布嵌谷驅馬歷層澗岷河源涉屢蜀甸途行憒矢橐
弧室豈領軍儋爵食祿由從宦注意奏凱赴都畿速令
提兵還石坂三川頓使氣象清賣刀買犢消憂患

西亭早秋送徐員外

鼎鉉辭台座麾幢領益州曲池連月曉橫角一作笛滿城
秋有美皇華使曾同白社遊今年一作來重相見偏覺艷

歌愁

送徐員外還京

一作使
還上都

九折朱輪動三巴。白露生蕙蘭。秋意晚。關塞別。魂驚寶
瑟。連宵怨金罍。盡醉傾旄頭。星未落。分手轆轤鳴。

送柳郎中

一作柳侍御
李侍郎

裴起居

沱江水綠波喧鳥去喬柯南浦別離處東風蘭杜多長
亭春婉婉層漢路蹉跎會有歸朝日班超奈老何

八月十五酬從兄常望月有懷

坐愛圓景滿況茲秋夜長寒光生露草夕韻出風篁地

遠驚金奏天高失

一作共

鴈行如何北樓望不得

共一作及在

池塘

酬太常從兄留別

一作送太常十二兄
罷冊南詔却赴上都

鄉路日一作自茲始征軒行復留張騫隨漢節王濬守刀

州澤國煙花度銅梁霧雨愁別離無可奈萬恨錦江流

春日與諸公汎舟

千里雪山開沱江春水來駐帆雲縹渺次管鶴裏回身
外流年駛尊前落景催不應歸棹遠明月一作在高臺

送兄歸洛使謁嚴司空

六歲蜀城守千莖蓬鬢絲憂心不自遣骨肉又傷離楚
峽饒雲雨巴江足夢思殷勤孔北海時節易流二字諸本缺

移

同洛陽諸公餞盧起居

蕭條寒日晏悽慘別魂驚寶瑟無聲怨金囊故贈輕赤
墀方載筆油幕尚言兵暮宿青泥驛煩君淚滿纓

臺中題壁

柏臺年未老蓬鬢忽蒼蒼無事裨明主何心弄憲章雀

聲愁霰雪鴻思恨闋梁會脫簪纓去故山瑤草芳

江上寄隱者

歸舟不計程江月屢虧盈靄靄滄波路悠悠離別情兼
葭連水國鼙鼓近梁城却憶沿江叟汀洲春草生

送嚴紳遊蘭溪

剝嶺窮邊海君遊別嶺西暮雲秋水閣寒雨夜猿啼地
僻秦人少山多越路迷蕭蕭驅匹馬何處是蘭溪

秋思

秋室一作空 浩煙霧風柳怨寒蜩機杼夜聲切蕙蘭芳意

消美人湘水曲桂檝洞庭遙常恐時光謝蹉跎紅豔凋

夏日別盧太卿

一作江津對雨送盧侍御

漢水清且廣江波渺復深葉舟煙雨夜之子別離
心汀草結春怨山雲連暝陰年年南北淚今古共

霑襟

西亭題壁寄中書李相公

一作寄上中書李相公

昏旦倦興寢端憂力尚一作坐向微廉頗不覺老謾瓊始

知非授鉞虛三顧持衡曠萬機空餘蝴蝶夢迢遙故山歸

一作會應舟楫
便煙雨五湖歸

八月十五日夜與諸公

一無此三字

錦樓望月得中

字

玉輪初滿空迥出錦城東相向秦樓鏡分飛碣石鴻桂
香隨窈窕珠綴隔玲瓏不及前秋月

一作圓輝一作光

鳳沼中

四

一作西

川使宅有韋令公

一作太尉

時孔雀存焉暇

日與諸公同翫座中兼故府賓妓興嗟一作歎
之因賦此詩用廣其意

苟令昔居此故巢留越禽動搖金翠尾飛舞碧梧一作池玉池

又作雉
又作階
音陰一作音上客徹瑤瑟美人傷蕙心會一作知因南

國使得一作歸放海雲深

寶三中丞去歲有臺中五言四韻未及酬報今
領黔南途經蜀門百里而近願言欵覲封畧間
然因追曩篇持以贈之

在昔謬司憲常僚惟有君報恩如皎日致位等青雲削
藁書難見除苛事早吟雙旌不可駐風雪路岐分

春分與諸公同宴呈陸三十四郎中

南國宴佳賓交情老倍親月慙紅燭淚花笑白頭人寶
瑟常餘怨瓊枝不讓春更聞歌子夜桃李豔妝新

津梁寺採新茶與幕中諸公遍賞芳香尤異因

題四韻兼呈陸郎中

靈州一作碧巖下萬英初散芳塗塗猶宿露采采不盈

筐陰寶藏煙濕單衣染焙香幸將調鼎味一為奏明光

元和癸巳余領蜀之七年奉詔徵還二月二十

八日清明途經百牢關因題石門洞

一作石洞門

昔佩兵符去今持相印還天光臨井絡春物度巴山鳥道青冥外風泉洞壑間何慙班定遠辛苦玉門闕

夕次潘

一作山下

南國獨行日三巴春草齊漾波歸海疾危棧入雲迷錦谷嵐煙裏刀州晚照西旅情方浩蕩蜀魄滿林啼

夏日對雨寄朱放拾遺

才非谷永傳無意謁王侯小暑金將伏微涼麥正秋遠
山欹枕見暮雨閉門愁更憶東林寺詩家第一流

早春送歐陽鍊師歸山

雙鶴五雲車初辭漢帝家人寰新甲子天路舊煙霞羽
節臨風駐霓裳逐雨斜崑崙有琪樹相憶寄瑤華

長安春望

宿雨淨煙霞春風綻百花綠楊中禁路朱戟五侯家草

色金闌晚鶯聲御柳斜無媒猶未達應共惜年華

經嚴祕校維故宅

掩淚山陽宅生涯此路窮香銷芸閣閉星落草堂空麗藻浮名裏哀聲夕照中不堪投釣一作予處隣笛怨春風

秋夜寄江南舊遊

寥落九秋晚端憂時物殘隔林螢影度出禁漏聲寒愁雨洞房掩孤燈遙夜闌懷賢夢南國興盡水漫漫

送陸書一本下還吳

有記字

君住包山下何年入帝鄉成名歸舊業歎別見秋光
橘柚吳洲遠蘆花楚水長我行經此路京口向雲陽

山中月夜寄朱張二舍人

午夜更漏裏九重霄漢間月華雲闕迥秋色鳳池間御
錦通清禁天書出暗闕嵇康不求達終歲在空山

送馮諫議赴河北宣慰

漢代衣冠盛堯年雨露多恩榮辭紫禁冰雪渡黃河待
詔孤城啓宣風萬歲一作里和今宵燕分野應見使星過

夜坐聞雨寄嚴十少府

多負雲霄志生涯歲序侵風翻涼葉亂雨滴洞房深迢
邇三秋夢殷勤獨夜心懷賢不覺寐清磬發東林

資聖寺賁法師晚春茶會

虛室晝常掩心源如悟空禪庭一雨後蓮界萬花中時
節流芳暮人天此會同不知方便理何路出樊籠

慈恩寺起上人院

禪堂支許同清論道源窮起滅秋雲盡虛無夕靄空池

澄山倒影林動葉翻風他日焚香待還來禮惠聰

送魏正則擢第歸江陵

客路商山外離筵小暑前高文常獨步折桂及齡年闊國通秦限波濤隔漢川叨同會府選分手倍依然

酬韓弇歸崖見寄

惆悵人間事東山遂獨遊露凝瑤草晚魚戲石潭秋軒冕免應相待煙霞莫遽留君看仲連意功立始滄洲

河東贈別鍊師

多累有行役相逢秋節分游人甘失路野鶴亦離羣戎
馬犯邊壘天兵屯塞雲孔璋才素健羽檄定紛紛

秋日將赴江上楊弘微時任鳳翔寄詩別

寂寞兩相阻悠悠南北心燕驚滄海遠鴻避朔雲深夜
夢江亭月離憂隴樹陰兼秋無限思惆悵屬瑤琴

夏與熊王二秀才同宿僧院

共將纓上塵來問雪山人世網從知累禪心自證真境
空宜入夢藤古不留春一聽林公法靈嘉願寄身

宜陽所居白蜀葵答詠東諸公

冉冉衆芳歇亭亭虛室前敷榮時已背幽賞地宜偏紅
豔世方重素華徒可憐何當君子願知不競喧妍

送寇侍御司馬之明州

斟酒上河梁驚魂去越鄉地窮滄海闊雲入剡山長蓮

唱蒲萄一作魚熟人煙橘柚香蘭亭應駐楫今古共風光

送嚴侍御

巴徼故人去蒼蒼楓樹林雲山千里合霧雨四時陰峽

路緩聲斷桃源犬吠深不須貪勝賞漢節待南侵

酬元十二

偶尋烏府客同醉習家池積雪初迷徑孤雲遂失期風
前勞引領月下重相思何必因尊酒幽心兩自知

秋晚途次坊州界寄崔玉一作五員外

崎嶇崖谷迷寒雨暮成泥征路出山頂亂雲生馬蹄望
鄉程杳杳懷遠思悽悽欲識分麾重孤城萬壑西

度東徑嶺

又過鴈門北不勝南客悲三邊上巖見雙淚望鄉垂草
角雲中戍殘陽天際旗更看飛白羽胡馬在封陲

送李正字之歸一作蜀

已獻甘泉賦仍登片玉科漢官新組綬蜀國舊煙蘿劍
壁秋雲斷巴江夜月多無窮別離思遙寄竹枝歌

玉泉寺與潤上人望秋山懷張少尹

山寒天降霜煙月共蒼蒼況此緣巖晚尚餘丹桂芳禪
心殊衆諸本缺此四字樂人世滿秋光莫怪頻回首孤雲思帝

鄉

酬崔使君寄麈尾

賢人嘉尚同今製古遺風
寄我襟懷裏辭君掌握中
金聲勞振遠玉柄借談空
執玩馳心處迢迢巴峽東

送鄧州潘使君赴任

川陸一都會旌旗千里舒
虎符中禁授熊軾上流居
橘袖金難並池塘練不如
春風行部日應駐士元車

和李中丞題故將軍林亭

帝里清和節侯家邸第春煙霏瑤草露一作苔暗杏梁

塵城郭悲歌舊池塘麗句新年年車馬客鐘鼓樂他人

送韋侍御司議起東都

洛京千里近離緒亦紛紛文憲芙蓉沼元方羔鴈羣河

闕一作連翠樹嵩少接秦雲獨有臨風思一作秋睽攜

不可聞

送吳侍御司馬赴台州

盧耽佐郡遙川陸共一作迢迢風景輕一作吳會文章

變越謠煙林繁橘柚雲海浩波潮余有靈山夢前君到

石橋

送七兄赴歙州

車馬去憧憧都門聞曉鐘客程將日遠離緒與春濃流
水踰千度歸雲隔萬重玉杯傾酒盡不換慘悽容

德宗皇帝挽歌詞三首

第 二 首 第 一
句 缺 一 字

道啓軒皇聖威揚夏禹功謳歌亭育外文武盛明中日
月光連璧煙塵屏大風為人祈福處臺樹與天通

聖歷 勸政瑤圖慶運長壽宮開此地仙駕渺何鄉風

斷清笳調雲愁綠旆揚上升知不恨弘濟任城一作王成

嘗聞闔闔前星拱北辰籙今來大明祖輦駕橋山曲松柏韻幽音魚龍焰寒燭歲歲秋風辭兆人歌不足

順宗至德大聖皇帝挽歌詞三首

橋山同軌會軒后葬衣冠東海風波變西陵松柏攢鼎湖仙已去金掌露寧乾萬木泉扃月空憐鳬雁寒容衛曉徘徊嚴城闔闔閉烏號龍馭遠遏密鳳聲哀崑

浪黃河注崦嵫白日頽
恭聞天子孝不忍望銅臺

哀挽渭川曲空歌汾水陽
夜泉愁更咽秋日慘無光
纊夏功傳啓興周業繼昌回
瞻五陵上煙雨為蒼蒼

昭德皇后挽歌詞

玉宸將遷坐金雞忽報晨
珮環儻馭遠星月夜臺新劍
沒川空冷菱寒鏡不春國門一作家車馬會多是濯龍親

春晚奉陪相公一無此四字西亭宴集

林花一作苑春向闌高會重邀歡
感物惜芳景放懷因綵

翰玉顏穠處並銀燭焰中看若折持相贈風光益別難

金文正月卷之二

卷三百十六

御定全唐詩卷三百十六

欽定四庫全書薈要卷一萬七千七百二十二

集部

御定全唐詩卷三百十七

武元衡

送崔判官使

一作太原

勞君車馬此逡巡我與劉君本世親兩地山河分節制
十年京洛共風塵笙歌幾處胡天月羅綺長留蜀國春

報主由來

一作末由

須盡敵相期一作
煙塵

三
北

萬里寶刀新

幕中諸公有觀獵之作因繼之

刀州城北劍山東甲士屯雲騎散風旌旆遍張林嶺動
豺狼驅盡塞垣空銜蘆遠雁愁繁繳繞樹啼猿怯避弓
為報府中諸從事一作從事說燕然未勒莫論功

同幕中諸公送李侍御歸朝一作臺

昔年專席奉清朝今日持書即舊僚珠履會中蕭管思
白雲歸處帝鄉遙巴江暮雨連三峽劍壁危梁上九霄
歲月不堪相送盡頹顏更被一作為別離凋

送張六諫議歸朝

詔書前日下丹霄頭戴儒冠脫皂貂笛怨柳營煙一作花

漠漠雲愁江館雨蕭蕭鴛鴦得路爭先翥松柏一作檜凌

寒霜一作獨一作貴後凋歸去朝端如有問玉闕門一作凌一作檜

關外老班超

酬嚴司空荊南一作見寄

州

金貂再領入一作三公府玉帳連封萬戶侯簾捲青山巫

峽曉煙開碧樹一作雲凝碧岫渚宮秋劉琨坐嘯風清塞謝朓

題裁一作詩月滿樓白雪調高歌不得美人南國一作陽臺

相顧國翠蛾愁一本此題載二首首聯作漢家征鎮委
一作望條侯虎節龍旌居上頭一聯作金笳曾

掩胡人淚麗句初

傳明月接餘同

南徐別業早春有懷

生涯擾擾竟何成自愛深居隱姓名遠雁臨空翻夕照
殘雲帶雨過春城花枝入戶猶含潤泉水侵階乍有聲
虛度年華不相見離腸懷土併闋情

摩訶池宴

摩訶池上春光早愛水看花日日來穠李雪開歌扇掩

綠楊風動舞腰回
蕪臺事往空留恨
金谷時危悟惜才
晝短欲將清夜繼
西園自有月襄回

至櫟陽崇道寺聞嚴十少府趨侍

雲連萬木夕沈沈
草色泉聲古院深
聞說羊車趨盛府
何言瓊樹在東林
松筠自古多年契
風月懷賢此夜心
惆悵送君身未達
不堪搖落聽秋砧

春暮郊居寄朱舍人

幽深不讓一作謝
子真居度日閒
眠世事疎春水滿池新

雨霽香風入戶落花餘目隨鴻雁窮蒼翠心寄溪雲任
卷舒回首知音青瑣闥何時一為薦相如

送溫況游蜀

遊人西去客三巴身遂旅蓬不定家山近峨眉飛暮雨
江連濯錦起朝霞雲深九折刀州遠路繞千巖劍閣斜
應到嚴君開卦處將余一為問生涯

崔敷歎春物將謝恨不同覽時余方為事牽束
及往尋不遇題之留贈

九陌遲遲麗景斜
禁街西訪隱淪賒
門依高柳空飛絮
身逐閑雲不在家
軒冕強來趨世路
琴尊空負賞年華
殘陽寂寞東城去
惆悵春風落盡花

秋燈對雨寄史近崔積

坐聽宮城傳晚漏
起看衰葉下寒枝
空庭綠草結離念

一作閣
行處

細雨黃花贈所思

一作獨對時

蟋蟀已驚良

一作涼節

度一作至
茱萸偏憶故人期
相逢莫厭尊前醉
春去秋來

自不知

春題龍門香山寺

衆香天上梵仙宮，鐘磬寥寥半碧空。
清景乍開松嶺月，亂流長響石樓風。
山河杳映春雲外，城闕參差暮靄曉。
樹中欲盡出尋那，可得三千世界本無窮。

酬陸三與鄒十八侍御

城分流水郭連山，拂露一作霧開懷一解顏。
令尹關中山，令尹關中史。

會河陽縣裏玉人閒，共憐秋隼驚飛至。
久想一作報雲。

鴻待侶還莫恨一作怪，殷勤留此地。
東崖桂樹昔同攀。

酬談校書長安秋夜對月寄諸故舊

故園千里渺遐情黃葉蕭條白露生驚鵠遠枝風滿幌
寒鐘送曉月當楹蓬山高價傳新韻槐市芳年挹盛名
莫怪孔融悲歲序五侯門館重婁卿

送田三端公還鄂州

孤雲迢遞戀滄洲勸酒梨花對白頭南陌送歸車騎合
東城怨別管弦愁青油幕裏人如玉黃鶴樓中月並鉤
君去庾公應借問馳心千里大江流

送李

一作韋

秀才赴滑州詣大夫舅

陌頭車馬去翩翩白面懷書美少年東武楊公姻姪一作好
重西州謝傅舅甥賢長亭叫月新秋雁官渡舍風古
樹蟬知已滿朝留不住貴臣河上擁旌旃

秋日書懷

金貂玉鉉奉君恩夜漏晨鐘老掖垣參決萬機空有媿
靜觀羣動亦無言杯中壯志紅顏歇林下秋聲絳葉翻
倦鳥不知歸去日青蕪白露滿郊園

南昌灘

渠江明淨峽逶迤
船到名灘拽缆遲
櫓竈動搖妨作夢
巴童指點笑吟詩
禽餘宿麥黃山腹
日背殘花白水湄
物色可憐心莫限
此行都是獨行時

奉和聖製豐年多慶九日示懷

令節寰宇泰
神都佳氣濃
賡歌禹功盛
擊壤堯年豐
九奏碧霄裏
千官皇澤中
澄一作澹南山凝黛曲
水清涵空

金玉美王度
歡康謠一作謠康
國風睿文垂
日月永與天無

窮

夏日陪馮許二侍郎與嚴祕書遊昊天觀覽舊

題寄同里楊華州中丞

一作夏日陪朝
寮同遊昊天觀

三伏草木變九城

一作域

車馬煩碧霄迴騎射

一作吹

丹洞

入桃源臺殿雲浮棟綾纓鶴在軒莫將真破妄聊用靜
持喧石甃古苔冷水筠涼簾翻黃公爐下歎飲

一作旌旆

國東門

奉和聖製重陽日即事

玉燭降寒露我皇歌古

一作大

風重陽德澤展

一作振

萬國

歡娛同綺陌擁行騎香塵凝曉空神都自藹藹佳氣助

一作動葱葱律呂陰陽

一作金石

暢景光天地通徒然被鴻霈

一作濡無以報玄功

秋日臺中寄懷簡諸僚

憲府日多事秋光照碧林干雲巖翠合布石地苔深憂
悔耿遐抱塵埃繙素襟物情牽跼促友道曠招尋頽節
風霜變流年芳景侵池荷足幽氣煙竹又繁陰簪組赤

墀戀池魚滄海心滌煩滯幽賞永度

一作期振

瑤華音

奉酬淮南中書相公見寄

并序

皇帝改元之二年余與趙公同制入輔並為黃門
侍郎夏五月連拜弘文崇文大學士冬十月詔授
檢校吏部尚書兼門下侍郎彫弓張矢出鎮西蜀
後九月趙公加大司馬之秩右弼如故龍旂虎符
出制淮海時號揚益俱為重藩左右皇都萬里何
遠公手提兵柄心匠化源芳詞况余情勤靡極質

文相映金玉鏘然蜀道之阻長楚郊之風物襟靈
所屬盡在斯矣永懷趙公歲寒交好之情因成詩
人不可方思之義聊書匪報以欵遐心

揚州隋故都竹使漢名儒翊聖恩華異持衡節制殊朝
廷連受賑台座接訏謨金玉裁王度丹書奉帝俞九重
辭象魏十萬握兵符鐵馬秋臨塞虹旌夜渡瀘江長梅
笛怨天遠桂輪孤浩歎煙霜曉芳期蘭蕙蕪雅言書一

札賓一作濱海雁東隅歲月奔波盡音徽霧雨濡蜀江分

井絡錦浪入淮湖獨抱相思恨關山不可踰

甫一作構西亭偶題因呈監軍及幕中諸公

瀛海無因泛崑丘豈易尋數峰聊在目一境暫清心悅
彼松柏性愛茲桃李陰列芳憑有土叢幹聚成林信矣
子牟慙歸歟尼父吟暗香蘭露滴空翠蕙樓深負鼎位
嘗忝荷戈年屢侵百城煩鞅掌九仞喜嶧嶭巴漢汎沿
楫岷峨千萬岑恩偏不敢去范蠡畏鎔金

和楊弘微春日曲江南望

遲景靄悠悠傷春南陌頭暄風一澹蕩遐思幾殷憂龍
去空仙沼鸞飛掩妓樓芳菲餘雨露冠蓋舊公侯朱戟
千門閉黃鸝百轉愁煙濛宮樹晚花咽石泉流寒谷律
潛應中林蘭自幽高山將避漢晉室正藩周黍稷聞興
歎瓊瑤畏見投君心即吾事微向一作尚在滄洲

長安秋夜懷陳京昆季

鐘鼓九衢絕出門千里同遠情高枕夜秋思北窗空靜
見煙凝燭閒聽葉墜桐玉壺思洞徹瓊樹憶葱蘢螢影

疎簾外鴻聲暗雨中羈愁難會面嬾慢青微躬甲乙科
攀桂圖書閣踐蓬一瓢非可樂六翮未因風寥落悲秋
盡蹉跎惜歲窮明朝不相見流淚菊花叢

冬日漢江南行將赴夏口途次江陵界寄裴尚

書

五部擁雙旌南依墨客卿關山迥梁甸波浪接溢城煙
景迷時候雲帆渺去程蛤珠馮月吐蘆雁觸羅驚浦樹
凝寒晦江天湛鏡清賞心隨處愜壯志逐年輕舟楫不

可駐提封如任一作有情向方曾指路射策許言兵蘭渚

歇芳意菱歌非應聲元戎武昌守羊祜幸連營

奉酬中書李相公早朝於中書候傳點偶書所

懷

寥落曙鍾斷微明煙月沈翠霞仙仗合清漏掖垣深北
極星遙拱南山闕迥臨蘭釭竟曉談琪樹欲秋陰霄漢
慙聯步貂蟬媿並簪德容溫比玉王度式如金魚水千
年運簫韶九奏音代天驚度日擲地喜開襟文武時方

泰唐虞道可尋忝陪申及甫清淨奉堯心

甲午歲秋一作相國李公有北園寄贈之作吟翫

歷時屢促酬答機務不暇未及報章今古遽分

電波增感留墓劍而心許感一作偶鄰笛而意傷

寓哀冥寢以廣遺韻云

機事勞西掖幽懷寄北園鶴巢深更靜蟬噪斷猶喧仙
醞百花馥豔歌雙袖翻碧雲詩變雅皇澤葉流根未報
雕龍贈俄傷淚劍痕佳城闕一作開白日哀挽向去一作青

門禮命公台重煙霜隴樹繁天高不可問空使輔星昏
和楊三舍人晚秋與崔二舍人張祕監苗考功
同遊昊天觀時中書寓直不得陪隨因追往年
曾與舊僚聯遊此觀紀題在壁已有淪亡書事
感懷輒以呈寄兼呈東省三給事之作楊君見
徵鄙詞因以繼和

瑤圃高秋會金闕奉詔辰朱輪天上客白石一作日洞中
人珮響泉聲襍朝衣羽服親九重青瑣閉三秀紫芝新

化藥秦方士偷桃漢侍臣玉笙王子駕遼鶴令威身歎逝頽波速一作遠緘詞麗曲春重將悽恨意苔壁問遺塵

酬李十一尚書西亭暇日書懷見寄十二韻之

作

鼎鉉昔云忝西南分主憂煙塵開僰道旌節護蠻陬任重功無立力微恩未酬據鞍慙齒髮責帥懼春秋高德聞鄭履儉居稱晏裘三刀君入夢九折我回輶時景屢遷易茲言期退休方追故山事豈謂台階留遐抱一作挹

清淨理眷言蘭杜幽一緘瓊玖贈萬里別離愁巴嶺雲外
沒蜀江天際流懷賢耿遙思相望鳳池頭

秋懷奉寄朱補闕

上苑繁霜降騷人起恨初白雲深陋巷衰草遍閒居暮
色秋煙重寒聲牖葉虛潘生秋思苦陶令世情疎已製
歸田賦猶陳諫獵書不知青瑣客投分竟何如

奉酬中書相公至日園丘行事合於中書宿齋

移止於集賢院叙情見寄之什

郊廟祗嚴祀齋莊覲上玄別開金虎觀不離紫微天樹

古長楊接池清

一作深

太液連仲山方補袞

一作職

文舉自

傷年風溢

一作翼

銅壺漏香凝綺閣煙仍聞白雪唱流詠

滿鶯弦

途次

一下有照應二字

去國策羸馬勞歌行路難地崇秦制險人樂漢恩寬御
沼澄泉碧宮梨拂露丹鼎成仙馭遠龍化宿雲殘不問
三苗一朝作寵誰陪萬國歡至今松桂色長助玉樓寒

題故蔡國公主九華觀上池院

朱門臨九衢雲木靄仙居曲沼天波接層臺鳳舞餘暉
煙深碧篠香露濕紅蕖瑤瑟含風韻紗窗積翠虛秦樓
今寂寞真界竟何如不與蓬瀛異迢迢遠玉除

酬嚴維秋夜見寄

遙夜思悠悠聞鐘遠夢休亂林螢燭暗零露竹風秋啓
戶雲歸棟褰簾月上鉤昭明逢聖代羈旅別滄洲騎省
潘郎思衡闡宋玉愁神仙慙李郭詞賦謝曹劉松柏應

無變璣瑤不可酬誰堪此時景寂寞下高樓

途次近蜀驛蒙恩賜寶刀及飛龍廄馬使還奉

寄中書李鄭二公

一作李鄭
二中書

草草事行役遲遲違

一作出入

故關碧幃

一作幃

遙隱

一作隔

霧紅旆漸依山感激酬

一作轉

思淚星霜去國顏捧刀金

錫字歸馬玉連環威鳳翔雙闕征夫縱百蠻

一作龍鳳辭三署于

百蠻

應憐宣室召溫樹不同攀

歸燕

春色遍芳菲閑簷雙鶯歸還同舊侶至來遶故巢飛敢
望煙霄達多慙羽翮微銜泥傍金砌拾蘂到荆扉雲海
經時別雕梁長日依主人能一顧轉盼自光輝

送許著作分司東都

瑤瑟激淒響征鴻翻夕陽署分刊竹簡書蠹護芸香馬
色闊城曉蟬聲驛路長石渠榮正禮蘭室重元方不作
經年別離魂亦暫傷

聞相公三兄小園置宴以元衡寓直因寄上兼

呈中書三兄

一作九日致
齊禁省和中書李相公

休一作齊沐限中禁家山傳勝遊露寒潘省夜木落庾園

秋蘭菊迴幽步壺觴洽一作絕舊傳位高天祿閣詞異畔

牢愁孤思琴先覺馳暉水競一作共明朝不相見清祀

在園丘

西州陸員外歙州許員外郢州二使君

吳洲雲海接楚驛夢林長符節分憂重鶴鴻去路翔豔
歌愁翠黛寶瑟韻清商洲草遙池合春風曉旆張晉臣

多樂廣漢主識馮唐不作經年別離魂亦未傷

漸至涪州先寄王使君

治教通夷俗均輸問大田江分巴字水樹入夜郎煙毒
霧含秋氣陰巖蔽曙天路難空計日身老不由年將命
寧知遠歸心詎可傳星郎復何事出守五溪邊

石州城

丈夫心愛橫行報國知嫌命輕樓蘭徑百戰更道戍龍
城錦字寶車騎胡笳李少卿生離兩不見萬古難為情

寒食下第

柳挂九衢絲花飄萬家雪如何憔悴人對此芳菲節

途中即事

南征復北還擾擾百年間自笑紅塵裏生涯不暫閒

春日偶作

縱橫桃李枝淡蕩春風吹美人歌白苧萬恨在蛾眉

夏夜作

夜久喧暫息池臺惟月明無因駐清景日出事還生

左掖梨花

巧笑解迎人，晴雪香堪惜。隨風蝶影翻，誤點朝衣赤。

同陳六侍御寒食遊禪定

一無定字

藏山上人院

年少輕行樂，東城南陌頭。與君寂寞意，共作草堂遊。

贈佳人

步搖金翠玉搔頭，傾國傾城勝莫愁。若逞仙姿遊洛浦，
定知神女謝風流。

休暇日中書相公致齋禁省，因以寄贈

嘗聞聖主得賢臣三接能令四海春月滿禁垣齋沐夜
清吟屬和更何人

春興

楊柳陰陰細雨晴殘花落盡見流鶯春風一夜吹香夢

夢一作逐春風到洛城

酬襄起居西亭留題

一作留贈

豔歌能起關山恨紅燭偏遠凝寒邊塞情況是池

塘風雨夜不堪絲弦一作管盡離聲

送張侍御一作司錄赴京

江南煙雨塞鴻飛西府文章謝掾歸相送汀州蘭棹一
杜晚菱歌一曲淚霑盈一作衣

鄂渚送友

雲帆淼淼巴陵渡煙樹蒼蒼故郢城江上梅花無數落
一作發送君南浦不勝情

送裴戡行軍

一作錢襄行
軍赴朝命

珠履三千醉不歡玉人猶苦夜一作若飲永寒送君偏有無

言淚天一作足
下關山行路難

宿青陽驛

空山搖落三秋暮
螢過疎簾月露團
寂寞銀狐一作燈愁
不寐蕭蕭風竹夜
窗寒

送崔舍人起居

赤墀同拜紫泥封
駟牡連徵侍九重
惟有白鬚張司馬
不言名利尚相從

路岐重賦

芳郊欲別闌干淚故國難期聚散雲分手更逢江驛暮

馬嘶猿叫一作嘯不堪聞

重送盧三十一起居

相如擁傳有光輝何事闌干淚濕衣舊府東山餘妓在

重將歌舞送君歸

送張諫議

漢庭從事五人來回首疆場獨未回今日送君魂斷處

寒雲一作江寥落數株梅

同諸公夜讌監軍翫花之作

一作同幕府
夜宴惜花

五侯門館百花繁紅燭搖風白雪翻不似鳳皇池畔見

飄揚今隔上林園

郊居寓目偶題

晨趨禁掖暮郊園松桂蒼蒼煙露繁明月上時羣動息

雪峰高處正當軒

一作門

題嘉陵驛

悠悠風旆繞山川山驛空濛雨似煙路半嘉陵頭已白

蜀門西上更二作
更上青天

送柳郎中裴起居

望鄉臺上秦人在一去學射山中杜魄哀落日河橋千

騎別春風寂寞旆旌迴

秋日出遊偶作

黃花丹葉滿江城暫愛江頭風景清閒步欲舒山野性

貔貅不許獨行人一作行

夏夜餞裴行軍赴朝命

三年同看錦城花銀燭連宵照綺霞報國從來先意氣
臨岐不用重咨嗟

摩訶池送李侍御之鳳翔

柳暗花明池上山高樓歌酒換離顏他時欲寄相思字
何處黃雲是隴間一作關

送魏正則擢第歸江陵

商山路接玉山深古木蒼然盡一作畫合陰會府登筵君

最少江城秋至肯驚心

登闔閻古城

登高望遠自傷情柳發花開映古城全盛已隨流水去
黃鸝空轉舊春聲

尋三藏上人

北風吹雪暮蕭蕭問法尋僧上界遙臨水手持筇竹杖
逢君不語指芭蕉

山居

身依泉壑將時背路入煙蘿得地深終歲不知城郭事

手栽林一作松 竹盡成陰

長安賊中寄題江南所居茱萸樹

手種茱萸舊井傍幾回春露又秋霜今來獨向秦中見
攀折無時不斷腸

春齋夜雨憶郭道微

桃源在在未去一作阻風塵世事悠悠又遇春雨滴閒增清
夜久焚香偏憶白雲人

送嚴秀才

一下有赴舉二字

灞滻別離腸已斷江山迢遞信仍稀送君偏下臨岐淚
家在南州身未歸

春日酬熊執易南亭花發見贈

千株桃杏參差發想見花時人却愁曾一作堂忝陸機琴

酒會春亭惟願一淹留

中春亭雪夜寄西隣韓李二舍人

廣庭飛雪對愁人寒谷由來不悟春却笑山陰乘興夜
何如今日戴家鄰

立秋日與陸華原一作於縣界南館送鄒十八

陸一作

於縣界南館送鄒十八

一作立秋華原

南館別二客

風入昭

一作泥

陽池館秋片雲孤鶴

一作鴈

兩難留明朝獨

向青山郭唯有蟬聲催白頭

酬韋胄曹登天長寺上方見寄

青門

一作山

幾度霜襟淚併在東林雪外峰今日重煩相

憶處春光知

一作花

繞鳳池濃

陌上暮春

青青南陌柳如絲柳色螢聲晚日遲何處最傷遊客思

春風三月落花時

春日偶作

飛花寂寂燕雙雙南客衡門對楚江惆悵管弦何處發

春風吹到讀書窗

春暮寄杜嘉興昆弟

柳色千家與萬家輕風細雨落殘花數枝瓊玉無由見

空掩柴扉度歲華

渡淮

暮濤凝雪長淮水細雨飛梅五月天行子不須愁夜泊

綠楊多一作高處有人煙

與崔十五同訪襄校書不遇

梨花落盡柳花時庭樹流鶯日過遲幾度相思不相見

春風何處有佳期

夏日寄陸三達陸四逢并王念八仲周

士衡兄弟舊齊名還似當年在洛城聞說重門方隱相

古槐高柳夏陰清

秋原寓目

木落風高天宇開

一作曠

秋原一望思悠哉

邊城今少

足射鵠騎連鴈嗷嗷何處來

贈歌人

一作佳人贈

林鶯一哢四時春
蟬翼羅衣白玉人
曾逐使君歌舞地

清聲一作泉長嘯一作咽翠眉顰

同苗郎中送嚴侍御赴黔中因訪仙源之事

武陵源在朗江東流水飛花仙洞中莫問阮郎千古事
綠楊深處翠霞空

使次盤豆驛望永樂縣一無下四字

山川不記何年別城郭應非昔所經欲駐征車終日望

天一作大河雲雨晦冥冥

緜山道中口號

秋山寂寂一作寞秋水清寒郊木葉飛無聲王子白雲仙

去父洛濱行路夜吹笙

歲暮送舍人

邊城歲暮望鄉關身

一作方

逐戎旌未得還欲別臨歧無

限淚故園花發寄君攀

寓興呈崔員外諸公

三月楊花飛滿空飄颻十里雪如風不知何處香醪熟

願醉佳園芳樹中

單于曉角

胡兒吹角漢城頭月皎霜寒大漠秋三奏未終天便曉

何人不起望鄉愁

汴河聞笳

一作聞角

何處金笳月裏悲悠悠邊客夢先知單于城下

一作關

山曲今日中原總解吹

塞上春懷

東風河外五城喧南客征袍滿淚痕愁至獨登高處望
謫然雲樹重傷魂

塞外月夜寄荆南熊侍御

南依劉表北劉琨，征戰年年簫鼓喧。雲雨一垂千萬里，

長城秋月洞庭猿。

單于罷戰却歸題善陽館

單于南去善陽關，身逐歸雲到處閒。曾是五年蓮府客，

每聞胡虜哭陰山。

韋常侍以賓客致仕同諸公題壁

孤雲永日自徘徊，巖館蒼蒼遍綠苔。若望苑忽驚新詔下，

綵鸞歸處玉籠開。

學仙難

玉殿笙歌漢帝愁
驚龍儼駕望瀛洲
黃金化盡方士死
青天欲上無緣由

唐昌觀玉葉花

琪樹芊芊一作年年
玉葉新洞宮長閉
綵霞春日暮落英鋪
地雪獻花應過一作無復九天人

春曉一作晚聞鶯

寥寥一作寂寂蘭臺一作堂
曉夢驚綠林殘斜月思孤鶯猶

獨一作疑蜀魄千年恨化作冤禽萬轉聲

聞嚴祕書與正字及諸客夜會因寄

衡門寥落歲陰窮露濕莓苔葉厭風聞道今宵阮家會

竹林明月七人同

戲贈韓二秀才

名高折桂方年少心苦為文命未通聞說東堂今有待
飛鳴何處及春風

聞王仲周所居牡丹花發因戲贈

聞說庭一作亭花發暮春長安才子看須頰花開花落無人見借問何人是主人

酬王十八見招

王昌家直在城東落盡庭花昨夜風高興不辭千日醉

隨君走馬向新豐

贈道者

一作送

麻衣如雪一枝梅笑掩微妝入夢來若到越溪逢越女

紅蓮池裏白蓮開

重送白將軍

紅燭芳筵惜夜分
歌樓管咽思難聞
早知怨別人間世
不下青山老白雲

和李永題李將軍林園

落英飄葉雪紛紛
啼鳥如悲霍冠軍
逝水不迴弦管絕
玉樓迢遙鎖浮雲

同張惟送霍總

一作送崔
總赴池州

春風簫管怨津樓
三奏行人醉不留
別後相思江上岸

落花飛處杜鵑愁

贈別崔起居

三十年前會府同
紅顏銷盡兩成翁
別淚共將何處灑
錦江南渡足春風

春日偶題

山川百戰古刀州
龍節來分聖主憂

一作三州會合古
刀州紓緩來分宵
憂

肝
靜
守化條無一事
春風獨上望京夕
一作陽
樓

聽歌

月上重樓絲管秋佳人夜唱古梁州滿堂誰是知音者
不惜千金與莫愁

酬韋胄曹

相逢異縣蹉跎意無復少年容易歡桃李美人攀折盡
何如松柏四時寒

同幕府夜宴惜花

芳草落花明月榭朝雲暮雨錦城春莫愁紅豔風前散
自有青蛾鏡裏人

代佳人贈張郎中

洛陽佳麗本神仙
冰雪顏容桃李年
心愛阮郎留不住
獨將珠淚濕紅鉛

餞裴行軍赴朝命

來時聖主假光輝
心恃朝恩計日歸
誰料忽成雲雨別
獨將邊淚灑戎衣

秋日經潼關感寓

昔年曾逐漢征東
三授兵符百戰中
力保山河嗟下世

秋風牢落故營空

贈歌人

仙歌靜轉玉簫催
疑是流鶯禁苑來
他日相思夢巫峽
莫教雲雨晦陽臺

見郭侍郎題壁

萬里楓江偶問程
青苔壁上故人名
悠悠身世限南北
一別十年空復情

御定全唐詩卷三百十七